

Sofonías

*Nopa tonali quema ajsis ihueyi cualancayo
Totecó*

¹ Ya ni nopa camanali cati TOTECO techmacac niSofonías, na niicone Cusi, huan niiixhui Gedalías, huan niiompacá ixhui Amarías cati elqui icone Ezequías cati huejcajquiya itztoya. TOTECO techmacac ni camanali quema Josías, icone Amón, eliyaya tanahuatijquet ipan tali Judá.

² Quej ni quijjtohua TOTECO: “Niquixpolihuiltis nochí tamanti cati onca ipan ni taltipacti.

³ Niquinixpolihuiltis masehualme huan nochí tapiyalme. Niquinixpolihuiltis totome cati patantinemij ipan ilhuicac huan nopa michime cati itztoque ipan at. Nochi amo cuajcualme niquintahuisos huan niquintamiixpolihuiltis masehualme ten ni taltipacti.” Quej nopa quijjtohua TOTECO.

⁴ “Niquintatzacuiltis nochí masehualme ipan tali Judá huan nochí ipan altepet Jerusalén. Niquinsosolos nochí taixcopincayome ten Baal huan nochí cati quinhueyichihuaj. Nochi totajtzitzi cati quintequipanohuayaya j teteyome niquinixpolihuiltis huan ayecmo aqui quinelnamiquis. ⁵ Nojquiya niquinixpolihuiltis injuanti cati tejcoj inincalcuitapa huan motancauquetzaj para quihueyichihuase tonati, metzti huan sitalime. Niquinmictis nochí cati quijjtohuaj techhueyichihuaj na, pero nojquiya quihueyichihuaj nopa teteyot Milcom. ⁶ Nojquiya

niquinixpolihuiltis inijuanti cati achtohuiya techhueyichihuayabaj na cati niininTECO, pero ama mohuejatalijtoque ten na. Ayecmo quitemohuaj cati nopaquilis, yon ayecmo techtajtaniáj ma niquintiochihua.”

⁷ Xijtepanitaca huan xiquimacasica TOTECO. Amo ximolini iixpa. Ya monechcahuía itonal TOTECO, nopa tonali quema yaya tetatzacuiltis. Yaya ya quicualtalijtoc para quichihuas se tacajc-ahualisti huan elis imasehualhua cati miquise. Ya quinnnotztoc cati hualase quinmictiquij. ⁸ TOTECO quiijtohua: “Ipan nopa tonali quema nitetaj-tolsencahuas, niquintatzacuiltis nochitapalehui-jahua nopa tanahuatijquet huan nochiconehua huan nochitati moyoyontíaj quej nopa masehualme ten sequinoc talme. ⁹ Nojquiya niquintatzacuiltis inijuanti cati amo quinequij ipan moquetzase caltencuahuit pampa quintepanitaj teteyome. Huan niquintatzacuiltis cati tecajcayahuaj huan tetachtequilíaj para quitemitise ininchaj ininteteyohua ica tamanti tachtecti. Teipa quitemitíaj ininchajchaj inintecohua ica cati tachtecti.” ¹⁰ Nojquiya TOTECO quiijtohua: “Ipan nopa tonali chicahuac tzajtzise nopa masehualme cati itztoque campa hueli ipan altepet Jerusalén. Tzajtzise ten nopa caltemit cati itoca Michi hasta campa nopa colonia cati yancuic. Huan caquis-tis chicahuac quema huelonis nopa taixtejcolis. ¹¹ Huajca xiaxtica nochianmasehualme ipan nopa colonia campa tianquis pampa nochitana-macani huan nochí cati amechtanejtiyayaj tomi ya mijque.

¹² “Ipan nopa tonali nijtequihuis se taahuili ipan

altepēt Jerusalén huan niquintemos hasta niquin-pantis nochī masehualme cati mosiyajquetztoque ica paquilisti ipan tajtacoli. Nochī niquintatza-cultis pampa quijtohuayayaj: ‘TOTECO amo teno techchihuilis. Amo techchihuilis cati cuali, yon cati amo cuali.’¹³ Yeca inincualancaitacahua quinichtequilise nochī cati quipixtoque, huan in-inchajchaj quinsosolhuilise. Masque mochantise, amo huelis itztose nopona huan masque quito-case xocomecat, amo huelis quiise iayo.

¹⁴ “Nechcatitoc nopa tonal quema niininTECO nitetajtolsencahuas. Quena, tahuel nimantzi monechcahuijtihuala quema nitetatzacultis. Nelfiero elis nopa tonali hasta tacame cati más motemacaj chocase huan tahuejchihuase. ¹⁵ Ipan nopa tonal nesis quenicatza niininTECO ninelcualantoc huan nochī majmahuise huan ayecmo quimatisse taya quichihuase, san motamipasolose. Huan quema tamis nopa tasosololisti, ayecmo teno mocahuas. Elis se tonali ten tequipacholi huan taohuijcayot. Elis se tonali quema tamixtentos huan tzintayohuiyas. ¹⁶ Ipan nopa tonal molinis tapitzali huan miyac tzajtzise pampa sosolihuis inintepa nopa altepeme cati moyahualojoque. Huan huetzise nopa huejcapantique torres campa tachiyayayaj huejca para tamocuitahuise.

¹⁷ “Niquintaijyohuilitis nopa masehualme huan nemise quej popoyotzitzí pampa tajtacolchijque ica na niininTECO. Inieso mosemanas campa hueli quej quema mosemana taltepocti, huan in-inacayo palanis quej cuitat.”

¹⁸ Ipan nopa tonali yon ininplata tomi, yon inioro tomi amo huelis quinmanahuis ten ihueyi cualancayo TOTECO pampa noch i tali tamitatas ica icualancayo. Huan noch masehualme ipan taltipacti polihuise ica se talojtzi.

2

Nopa tonali quema TOTECO quintatzacuiltis nochit talme

¹ Ximosentilica huan ximoilhuica quenicatza anitztoque cati amo anpinahuaj iixpa TOTECO.

² Xijchihuaca amantzi. Amo xijcahuilica ma pano tonali quej tasoli cati quihuica ajacat. Amo xijchiyaca hasta ajsis nopa tonali cati niquijtoc toc hualas quema TOTECO tahuel cualanis amo huaya huan ajsis amopani ihueyi cualancayo.

³ Xijtemoca TOTECO noch amojuanti cati antiecneltzitzti ipan ni taltipacti huan amojuanti cati anquichihuaj cati quijtohua itanahuatilhua. Xijchihuaca cati xitahuac huan ximoicnonequica pampa quej nopa huelis anmomanahuise quema TOTECO tetatzacuiltis ica noch i cualancayo.

TOTECO quintelhuía filisteos

⁴ Ipan intial nopa filisteos nopa altepeme Gaza, Ascalón huan Asdod mocahuase nochisosoltique. Quitamitachtequilise huan cati noppa ehuan quintamiixpolihultise. ⁵ Nelfiero elis para amojuanti ancereteo masehualme cati anitztoque iteno hueyi at ipan tali Canaán pampa TOTECO amechtajtolsencahuas. TOTECO amechtzontamiltis noch i cati anitztoque ipan nopa tali ten nopa filisteos huan amo aqui mocahuas.

⁶ Nopa tali cati eltoc nechca hueyat elis se sacamili. Nopona mosentilise tamocuitahuiani ten borregojme huan quichihuase tatzacti para ininborregojhua.

⁷ Huan nopa tali Judá ehuani cati noja mocahuase yoltoque moaxcatise nopa tali huan nopona tacuase ininborregojhua. Ica tayohua cochise ipan nopa calme cati eltoc ipan Ascalón pampa TOTECO ininDios hualas quinpaxaloqui imasehualhua huan quinquixtis ten campa tequipanotoj ipan talme cati huejca.

TOTECO quintatzacuiltis moabitame huan amonitame

⁸ Yaya quiijtohua: “Na nijcactoc quenicatza nopa moabitame huan amonitame quintaijilhuijtoque nomasehualhua. Quinpinajtijtoque huan quincuiljitoque inintal.” ⁹ Quej ni quiijtohua TOTECO Cati Quinyacana lilhuicac Ejcahua Ma Tatanitij yaya cati ininDios israelitame: “Nimotestigojquetza ica na noselti huan niquijtohua para niquinixpolihuiltis nochí ipan tali Moab huan Amón quej nijchijqui ica altepeme Sodoma huan Gomorra huejcajquiya. Ipan Moab huan Amón san oncas tejtzonquilít huan miyac istat. Sosolijtos para nochipa. Huan noisraelita masehualhua cati noja mocahuase yoltoque ipan nopa tonali calaquise para moaxcatise nopa talme.” ¹⁰ Quej nopa ininpantis Moab huan Amón pampa mohueyimatque, huan quintaijilhuijque huan quinhuetzquilijque imasehualhua TOTECO Cati Quinyacana lilhuicac Ejcahua Ma Tatanitij. ¹¹ TOTECO quinchihuilis cati fiero huan

nelía tahuel quinmajmatis. Quinixpolihuiltis nochí teteyome catí quinhueyichihuaj ipan nopa talme. Quej nopa nochí talme ipan taltipacti quihueyichihuase TOTECO. Sesen quihueyichihuas ipan ya ital.

TOTECO quitatzacuiltis Etiopía huan Asiria

¹² Huan TOTECO quijtohua: “Huan amojuanti ten tali Etiopía nojquiya nimechtzontamiltis ica nomacheta.” ¹³ Ica ihueyi chicahualis TOTECO nojquiya quintatzacuiltis nopa talme catí mopantíaj ica norte. Quitatzacuiltis tali Asiria huan ihueyi altepe, Nínive, quicahuas sosolijtoc quej se huactoc tali campa amo teno onca.

¹⁴ Nopona mosiyajquetzase borregoyme huan miyac tamanti tapiyalme ten campa hueli hualase para quipiyase ininchaj nopona. Miyac tamanti cuamoymojme cochise ipan nopa taquetzalme ten nopa caltanahuatilme catí achtohui eltoyaj yejyectzitz. Tzopilome itztose ipan inventanas huan ipan inincaltenhua san oncas miyac tajsoli. Huan nochí cuatetomit ten tiocuahuit mocahuas tanemijya.

¹⁵ Quej ni ipantic nopa altepet catí san pactoya huan catí eltoya temachti. Nopona nochí mohuey-imatiyayaj ipan iniyolo huan quijtohuayayaj: “Ipan nochí taltipacti amo onca seyoc altepet catí tahuel cuali quej ni.” Pero ama xiquitaca quenicatza mocajqui tasosololi huan mochijqui ininchaj tapiyalme. Nochi catí panose nopona san qui-huetzquilise huan quiojolinise inintzonteco para quipinajtise.

3

*Itajtacol Jerusalén huan quenicatza Toteco
quimanahuis*

¹ Nelfiero elis para altepet Jerusalén. Nelmosisinijtoque cati ehuani nopona. Ayecmo tapajpactique iixpa TOTECO ipampa inintajtacolhua. Tahuel tetaijyohuiltíaj quej quinequij. ² Cati nopona itztoque amo quitacaquiláj TOTECO ica-manal quema quinilhuía cati monequi quichihuase. Amo quema quinequij quichihuase cati xitahuac. Amo motemachíaj ipan TOTECO yaya cati ininDios, yon amo quitemohuaj.

³ Itayacancahua nopa altepet itztoque quej leones cati san nanalcatoque huan quichiyaj ajquia huelis quiitzquise. Ijueces itztoque quej lobos cati nemij tayohua para quimasiltise huan quitamicuase nochí cati quiitzquise hasta yon se iomiyo amo mocahuas para ijnaloc. ⁴ Cati motocaxtíaj tajtolpanextiani nopona senquisa tacajcayahuaj huan moijixpataj. Totajtzitzi nopona quimahuispolohuaj nochí tamanti cati tatzejtzelotic huan quiixpanoj itanahuatil TOTECO. ⁵ Pero TOTECO itztoc ipan Jerusalén huan yaya quichihua cati xitahuac. Amo teno cati amo cuali quichihua. Mojmosta quinextía para xitahuac nochí cati quijtohua huan quichihua. Huan nochipa nochí masehualme hueli quimati cati xitahuac. Pero amo aqui quichihua cuenta. Amo cuajcualme nopona, yon amo pinahuaj ica cati quichihuaj.

⁶ TOTECO quijtohua: “Niquinixpolihuitlijtoc miyac talme huan inimasehualhua. Nochí calme

nopona mocajque sosolijtoque huan inincalles mocajqui tatzitzicatoc. Inialtepehua tamisosolitoc hasta ayecmo mocajqui yon se masehuali. ⁷ Huan niquijto para ama quena, techimacasise huan techtacaquilise quema niquntacahualtis. Huan quej nopa ayecmo monequis niquntatza-cultis sempa quej achtohuiya. Pero amo moyolcuetque. Inijuanti noja más pejque quichi-huaj cati fiero.” ⁸ Huajca ama TOTECO quiijto-hua: “Xijpiyaca amoyolo huan techchiyaca hasta nopa tonali quema na nimoquetzas para niquntajtolsencahuas. Pampa na ya nijtalijtoc quema niquinseñtilis nochि talme ehuani huan nochि in-intanahuatijcahuas huan ininpa nijtoyahuas no-hueyi cualancayo. Huan nocualancayo elis quej se tit cati quintamitatis nochि ipan taltipacti.

⁹ “Ipan nopa tonali na niquinpajpaquilis inincamac nochि masehualme huan nochि inijuanti sentic huelise techhueyichihuase, niininTECO, ica san se iniyolo. ¹⁰ Nochi nomasehualhua cati mosemantoque campa hueli hasta ipan seyoc nali ten nopa hueyame ten tali Etiopía techtajtanise para sempa ma nieli inintECO huan hualase para techmacase inintacajcahuialis. ¹¹ Huan ipan nopa tonali ayecmo anquipanose pinahualisti por nochि nopa fiero tamanti cati ica antechixpanoque pampa ipan nopa tonali ayecmo anmosisinise ica na. Huan niquinijcuenis ten campa amojuanti nochि masehualme cati mohueyimatij huan motepanitaj, huan quej nopa ayecmo aqui mohueyimatis ipan notepe cati tatzejtzeloltic. ¹² Huan ten amojuanti niquincahuas ma

mocahuaca yoltoque se quesqui masehualme cati teicneltzitzi huan cati moicnonequij pampa inijuanti cati más nimantzi motemachíaj ipan na, niamotECO. ¹³ Huan nopa masehualme cati mocahuase yoltoque amo quichihuase tamanti cati amo cuali, amo istacatise, yon amo tacajcayahuase. Nopona tacuase huan cochise ica tasehuilisti, huan amo aqui quintemajmatis.”

¹⁴ Xihuicaca amojuanti cati anitztoque ipan altepet Sion. Xitzajtzica ica paquilsti nochि anisraelitame. Ximopaquilismacaca ica nochि amoyolo nochि ipan altepet Jerusalén. ¹⁵ Pampa TOTECO ayecmo más amechtatzacuiltis huan yaya quinquixtis nochि amocualancaitacahua. Huan TOTECO iseltitzi itztos amohuaya, yaya cati Tanahuatijquet ipan tali Israel. Huan huajca ayecmo quema anquiiitase cati amo cuali.

¹⁶ Ipan nopa tonali masehualme quinilhuise Jerusalén ehuani: “Amo ximajmahuica amojuanti ipan altepet Sion, yon amo ximahuihuipicaca.

¹⁷ Pampa TOTECO cati quipyia nochि chicahualisti hualajtoc para itztos amohuaya. Yaya amechmaquixtis. Yaya nelía yolpaquis ica amojuanti. Amechyoltalis ica iteicnelijcayo huan por amojuanti, huicas ica miyac paquilsti.”

¹⁸ Huan TOTECO quiijtohua: “Nimechsentilis amojuanti cati anmotequipachohuaj pampa amo hueliyaya anmosentilíaj ipan nopa tasentili cati tatzejzeloltique huan ayecmo aqui amechpinahaultis sempa. ¹⁹ Ipan nopa tonali na niquinattzacuiltis cati mitztaijyohuiltyayaj. Niquinmaquixtis nomasehualhua cati amo quipyaj chicahualisti huan cati amo hueli

momanahuise iniselti. Niquinquixtis nomasehualhua cati tetequipanoyayaj ipan nochí talme huan niquinhuálicas. Huan niquinhueyitalis huan quipiyase tatepanitacayot ipan nochí taltipacti.

²⁰ “Ipan nopa tonali na nimechsentilis huan nimechhualicas ipan amotal. Huan nimechmacas seyoc amotoca. Nimechhueyitalis huan nochí talme ipan taltipacti amechtepanitase. Ica amoixteyol anquiiitase para sempa nimechcual-talis huan sempa nimechmacas nochí cati an-quipiyayayaj.” Quej nopa quijito TOTECO.

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c565d9f9-d202-544b-b78a-3c93df26508e